

Nije usvojen državni zakon o razvoju informacionog društva niti je uspostavljena državna agencija za ovu oblast. U međuvremenu, Republika Srpska je osnovala svoju agenciju za informaciono društvo, u skladu sa Ustavom prema kojem 'informacione tehnologije' spadaju u nadležnost entiteta.

Sveukupna provedba pravila utvrđenih Zakonom o elektronskom potpisu koji je usvojen u novembru 2006. godine je spora. Nije postignut napredak u pogledu usvajanja zakonodavstva o uslugama uslovljenog pristupa. Nisu usvojeni podzakonski akti vezani za Zakon o elektronskom poslovanju. Republika Srpska je usvojila svoj Zakon o elektronskom poslovanju i izradila strategiju za e-vladu.

Ostvaren je ograničeni napredak u oblasti **audiovizuelne politike i medija**.

Ratifikovana je Konvencija o zaštiti i promociji raznolikosti kulturnog izraza UNESCO-a. Usvojena su pravila o uslovima pružanja i distribucije audiovizuelnih medijskih usluga i RTV programa i počela je njihova provedba. Bilo je određenog napretka u pogledu priprema za uvođenje digitalne zemaljske televizije (DTT).

Ipak, u toku izvještajnog perioda primjećeno je pogoršanje stanja medijskih sloboda u Bosni i Hercegovini. Od januara je linija za pomoć novinarima Udruženja novinara Bosne i Hercegovine zabilježila 16 verbalnih napada i direktnih fizičkih nasrtaja, prijatni smrću i drugih kršenja prava novinara. U poređenju sa 2008. godinom, ovo predstavlja povećanje od 20%. Od 173 zemlje, Bosna i Hercegovina zauzima 115. mjesto na listi Reportera bez granica koja procjenjuje stanje medijskih sloboda. Lokalne medijske organizacije odgovorne za slobodu medija malo su saradivale. Javni emiter Republike Srpske - RTRS i dnevne novine Republike Srpske - Glas Srpske su u aprilu istupili iz Udruženja novinara Bosne i Hercegovine najavivši osnivanje posebnog udruženja novinara za Republiku Srpsku.

Reforma sektora javnog emitiranja Bosne i Hercegovine napreduje sporo. Federacija Bosne i Hercegovine imenovala je upravni odbor Federalne televizije tek u junu 2009. godine. Zbog ovih kašnjenja nije registrovana kompanija za javno emitovanje Bosne i Hercegovine, koja bi bila odgovorna za pružanje smjernica i modernizaciju aktivnosti sva tri sistema za javno emitovanje. Štaviše, Zakon o javnom radio-televizijskom servisu Federacije Bosne i Hercegovine još uvijek nije u potpunosti usklađen sa Zakonom o javnom radio-televizijskom sistemu Bosne i Hercegovine. Reforma javnog emitovanja je u ozbiljnom zaostatku.

Sveukupno gledano, pripreme koje Bosna i Hercegovina vrši na planu informacionog društva i medija sporo napreduju. Posebne napore je potrebno usmjeriti na provođenje pravnog okvira u području javnog emitovanja, nastavak reformi u ovom sektoru i osiguranje funkcionalne nezavisnosti Regulatorne agencije za komunikacije.

4.2.7. Finansijska kontrola

Bosna i Hercegovina je ostvarila ograničeni napredak u oblasti finansijske kontrole.

Preduzeti su određeni koraci u oblasti **javne interne finansijske kontrole (PIFC)**. Na državnom i entiteskom nivou se provode zakoni o unutrašnjoj reviziji, ali je potrebno ojačati administrativne kapacitete kako bi se osiguralo pravilno upravljanje javnim fondovima. Radna grupa koju su činili predstavnici svih nivoa vlade izradila je dokument o politici djelovanja PIFC-a za državni nivo i za dva entiteta. Nakon što su tri ovakva dokumenta odobrena, potrebno je da se reforma usmjeri na razvoj djelotvornih sistema za upravljanje, te struktura za upravljanje finansijama i kontrolu (FMC). Na državnom nivou i u Republici Srpskoj su uspostavljene centralne jedinice za usklađivanje (CHU), ali nemaju dovoljan broj osoblja. Potrebno je osnovati CHU u Federaciji.

Kada se radi o **vanjskoj reviziji**, četiri institucije glavnog revizora u zemlji, jedna državna, dvije entitetske i jedna u Distriktu Brčko, nastavljaju sa provođenjem svog zajedničkog strateškog plana razvoja 2007-2012. na osnovu zakona o vanjskoj reviziji. Institucije glavnog revizora su pored redovnih finansijskih revizija, proširile svoje aktivnosti na reviziju cjelokupnog poslovanja. Njihova saradnja kroz odbor za koordinaciju pokazala se uspješnom. Parlamenti su unaprijedili svoje kapacitete u pogledu postupanja sa izvještajima o reviziji, ali je postupanje prema izvještajima i preporukama institucija glavnog revizora i dalje nezadovoljavajuće. Potrebno je dodatno ojačati nezavisnost institucija glavnog revizora u cilju usklađivanja sa međunarodnim standardima.

Sveukupno gledano, pripreme Bosne i Hercegovine u oblasti finansijske kontrole napreduju, ali sporo. Potrebni su jači naporu kako bi se poboljšala javna unutrašnja finansijska kontrola i postupanje po revizijskim izvještajima.

4.2.8. Statistika

Izvjestan napredak ostvaren je na području statistike.

U pogledu **statističke infrastrukture**, usvojen je novi plan rada za 2009-2012. On predviđa rast i širenje državne Agencije za statistiku (BHAS). Agencija trenutno ima 64 zaposlena, a cilj je da ih do 2015. godine bude 198. Ipak, potrebno je dodatno poboljšati saradnju između BHAS-a i entitetskih zavoda za statistiku. Postojeće zakonodavstvo i dalje se tumači na različite načine. Zakon o statistici Bosne i Hercegovine i Sporazum o saradnji i koordinaciji u oblasti statistike se ne provode pravilno. I dalje je otvoreno pitanje dostavljanja podataka o PDV-u i drugih podataka od strane Uprave za indirektno oporezivanje BHAS-u. Federalni Zavod za statistiku nije mogao finansirati važne ankete. Svi ovi elementi štetno utiču na izradu i razvoj tačnih statističkih podataka u cijeloj zemlji.

U pogledu klasifikacije i registara izrađen je registar poslovnih subjekata, ali on još uvijek nije u potpunosti operativan. BHAS je takođe otpočela rad na približavanju klasifikaciji NACE rev. 2 (statistička klasifikacija ekonomskih djelatnosti u Evropskoj zajednici).

Određeni napredak postignut je u oblasti **sektorske statistike**. Započele su pripreme za